


Tusagassiorfinnut nalunaarut: Nujuartat neqaanni parasitteqarneranik paasissutissiineq.

Qanittukkut kalaalimineerniarfimmi inuussutissanik piareersarneqarsimasunik tuniniaasinnaasoqalersillugu august 2018 aallarnerlugu, immikkut akuersissuteqartoqarneranut atatillugu Kalaallit Nunaanni Uumasut Nakorsaqaarnerannut Inuussutissalerinermullu Oqartussaasut nujuartat neqaanni parasittinik tunillatsittoqarsinnaanerani ilisimatitsissuteqarput.

Trikinose: Trikinose nappaataavoq ulorianartoq uumasuniit inunnut tunillaassinnaasoq. Nappaammut pissutaapput rundormelarver trikinenik taaneqartartut, pingaartumik nersutini qasuttuniittartut soorlu assersuutigalugu nannuni, aaverni, puisini, qimmini qimuttuni, amaqquni teriannissanilu. Trikinosemik tunillatsittoqarsinnaavoq uumasut siuliini taaneqartut neqaannik aapasunik nerigaanni. Neqimik qerititsineq trikininik tunillaajunnaarsitsisanngilaq. Neqimi trikinit qullugiaannik peqarnerasoq isaannarmik takuneqarsinnaanngilaq. Trikinoserneq inummiit inummut tuniluunneq ajorpoq.

Kalaallit Nunaanni inuit trikinoseqartut arlaleriarluni paasineqartarpoq. Trikinosernermut malunniutaasinnaapput inalukkatigut ajornartorsiuteqarneq, kissarulunneq, inuunilunneq nukitsigullu anniarisaqarneq. Isit sinaanni pullattoqarnera takuneqarsinnaakkajuttarpoq. Sakkortuumik tunillatsissimagaanni nukiit taamatuttaaq uummat ilungersunartumik ajoquserneqarsinnaapput.



Trikinip qullugiaa poorsimasoq nannup neqaani. Allisitsiuserluni assilliisoqarsimavoq. **Assilliisoq:** VFMG / DTU

Sarcocyster: Sarcocyster titarnertut qaqqortutut amitsutut takussaasarput neqimi qaqqorteqqasunut (suaasanut qaqqortunut) assingullutik. Sarcocyster Kalaallit Nunaata tuttuini takuneqarsimapput. Sarcocyster Kalaallit Nunaanni inunnut tunillaassimanersoq malussartoqarsimanngilaq. Nunani eqqiluisaarnikkut atortuluttuni sarcocysterinik tunillatsittoqarsinnaavoq, puulukit nersussuillu neqaannik qalanneqarluannigitsunik nerisimagaanni. Timminneq, kissarulunneq, meriarneq, nukitsigut nukillaanganeq nukitsigullu annerisaqarneq tunillatsinnermut takussutaasinnaapput.



Sarcocyster tuttup neqaani. Assiliisoq: Pinngortitaleriffik

Qumaarsussuaq: neqimi pullarinertut mikisutut, qaqortutut ammalortutullu takuneqarsinnaasarput. Ammalortut qaqortut taakku qumaarsussuup qullugiarai puulinngortut, *Taenia krabbei*, neqimi toqusarsimasut. Qumaarsussuaq inersimasoq nersutit qaasuttut soorlu assersuutigalugu teriannissat, qimmit amaqqullu inalugaanniittarpoq qullugiaalu tuttut umimmaallu neqaaniissinnaallutik. *Taenia krabbei*-inik Kalaallit Nunaanni inunnut tunillaattoqarneranik malussartoqarsimanngilaq. Inuit qumaarsussuaqalikkajunnerusarput puulukip neqaanik, aalisakkanit taserneersunit imaluunniit nersussuit neqaannik nunanit eqqiluisaarnikkut atortuluttuneersunik qalallugit sianneqarsimanngitsunik nerigaangamik. Qumaarsussuit amerlasuut napparsimalissutaasannngillat ilaalli naarlulersitsisinnaapput, meriangulersitsillutik neriumarpiarunnaarsitsillutik akuttusuunillu sianiutilunermillu malunniutsitsisinnaallutik.




Qumaarsussuup qullugiaa tuttup neqaani. Assiliisoq: Pinngortitaleriffik

Tuttup kumai: Tuttop kumaa inersimasoq augustusip qaammataani tuttut amianni quperlulioortarpoq. Taamaalereerpat quperloq tuttup amia putullugu pulasarpog tassanilu ukiisarlu. Maj/junimi quperlup tuttu qimattarpaa nunamilu puulinngortarluni inersimasunngornissami tungaanut kinguaariiaarnerlu aallaqqaataaniit allarteqqittarlugu. Tuttop kumaa tuttunik puullaaqilersitsisarpog sanigortitsisinnaallunilu, soorluttaaq tuttup amianut ajoqusiisinnaalluni. Inuit tuttup kumaasa quperluinik nerinermikkut tunillanneqarsinnaanngillat. Taamaakkaluortoq inuit tunillatsisinnaanerannik allaaserinnittoqarsimavoq tuttup kumai inersimasut inuit nujaannut qarluinullu quperlulioortarsimasut.



Tuttup kumaasa quperlui tuttumi. Assiliisoq: F Ugarte.

Tuttup iggiaata kumaa: Qaammatini juli-aggustimi tuttup iggiaata kumaata inersimasup quperlut uumasut tuttut sorluinut tissalukaartittarpai. Quperlut taamaalereerpat anersaartornermut aqquataasigut ilorpartertarput toqqusaavisalu iluanni nipputtarlutik, tassani ukiisarlutik. Maj/junimi quperlut anillaqqittarput imaluunniit tuttunit suppussaasarlutik. Taamaalereerpat quperlut nunami inersimasunngornissamik tungaanut puulinggortarput kinguaariinnerlu aallaqqaataaniit aallartittarlugu. Tutup iggiaata kumaa tuttunik puullaqilersitsisarpoq sanigortitsisinnaallunilu. Inuit tuttup kumaasa quperluinik nerinermikkut tunillanneqarsinnaanngillat.



Iggissap kumaasa quperlui tuttup iggiaani. Assiliisoq: C Cuyler / Pinngortitaleriffik

Ima ilioruit napparsimalissanngilatit;

Mianersornissamik tunngaveqarneq aallaavigalugu kaammattuutigineqassaaq nujuartat neqaat 75° Celsiusinut iluunngarlugit kissanneqartassasut. Taamatut uunartumiititsineq uumasuaqqanut miluuffigisaminut inuussutilinnut toqoraataassaaq. Neqi naammattumik qalaassaq siatarluunniit qasertumik kajorpassisumilluunniit qalipaateqalersarpoq.

Negimik qerititsineq, pujoorineq nikkulinerluunniit trikininut, qumaarsussuarnut sarcocysterinulluunniit toqoraataanngillat.

Uumasut nujuartat neqaat qalanneqarluarsimanngitsut nunaannarmut qimanneqartassanngillat qimminulluunniit nerukkaatigineqartassanatik. Taakku tamarmik uumasuarsunnik ingerlatitseqqeqataasinnaapput tassami kinguaassiornerminni uumasut qaasuttut (soorlu teriannissat qimmillu) silutuumasullu pisariaqartikkamikkit. Illittaaq qimmitit malussarniarfigisassavatit - ilittulli - neqimik tunillannartulimmik nerinermikkut napparsimalersinnaammata.

Neqinik uumasuarsunnik tunillanneqarsimasunik qimatsisariaqalissaguit kaammattuutigineqassaaq ikuallassagitit, minnerpaamik 1 meteritut ititigisumut nunami matuussagitit imaluunniit imaanut kivisissagitit.

Nalorniguit UNIO-mit kaammattuutigaarput neqi nerissanngikkitt.

Inussiarnersumik inuulluaqqusilluta/ Med venlig hilsen

Kalaallit Nunaanni Uumasunut Nakorsaqaqarnermut Inuussutissalerinermullu Oqartussaqaarfik

Apeqqutissat uunga ingerlatinneqassapput:

Kalaallit Nunaanni Uumasunut Nakorsaqaqarnermut Inuussutissalerinermullu Oqartussaqaarfik

Aqqusinersuaq 31 2 tv

3900 Nuuk

E-mail: uumasut@nanog.gl

Oqarasuaatip nr.: 34 50 00